

帝之仁義則民利其利比於王之時相去百倍矣絕棄霸者
功利以反於王之聖智則雖未及帝之時而思慮深遠政教
修明亦無有爲盜賊者矣

此三者以爲文不足故令有所屬見素抱樸少私寡欲

三者仁義聖智巧利也屬與莊子屬其性乎仁義之屬同猶
云附著也皇之大道實有餘文不足自皇而降漸漸趨文帝
者以皇之治爲文不足於是降大道一等而附著於仁義王
者以帝之治爲文不足於是降仁義一等而附著於聖智伯
者以王之治爲文不足於是降聖智一等而附著於巧利三
者之治各令有所附著者以文不足故爾爾而豈知大道之民
外之相示以素內之自守以樸素者未染色之絲也樸者未
斲器之木也質而已矣奚以文爲惟其質而不文是以民雖
有身而似無身其有私焉者少矣民雖有心而似無心其有
欲焉者寡矣

右第十六章

絕學無憂

爲學日益必事事而爲之有一不能不知則以爲憂矣惟絕
之而不爲則無憂也

唯之與阿相去幾何善之與惡相去何若

以下言爲學則有憂之事唯阿皆應聲唯正順阿邪語幾何

言甚不相遠也何若言何如其相遠也學應對者唯與阿其
初相去本不遠而唯則爲善阿則爲惡其究相去迺甚遠故
學唯者惟恐其或流於阿此舉可憂之一事而言也
人之所畏不可不畏荒兮其未央哉

荒猶廣也央猶盡也畏阿之爲惡則不敢阿矣然此特一事
爾凡人之所畏而不敢爲者皆不可以不畏其事甚多而未
易窮盡此爲學者之所以多憂也

眾人熙熙如享太牢如登春臺我獨泊然其未兆如嬰兒之未
孩

熙熙和樂貌泊靜也兆如龜兆之微折眾人之爲學者徇外

道藏輯要

道德真經註

二十一

心集十

以爲悅如享太牢而食可悅口者甚美如登春臺而觀可悅
目者甚備我則泊然而靜情欲未開無端倪可見如嬰兒未
能孩笑之時一不知外物之爲樂也

乘乘兮若無所歸

乘乘謂寄寓於物若無所歸謂不著於物

眾人皆有餘我獨若遺

遺失也眾人喜其所得之多我則一無所得而慊然若有失
也

我愚人之心也哉沌沌兮

沌如渾沌之沌冥昧無所分別也作平聲讀亦與莊子混沌

之菴同謂無知也○沌杜本切

俗人昭昭我獨昏昏俗人察察我獨悶悶

昭昭已明察察尤明昏昏已不明悶悶尤不明俗人皆以有知爲智我獨無知而愚也

漂兮其若海颶兮若無所止

如漂浮於海中任其所適而不知其所定向如颶颶之長風隨其所起而不知其所止息

眾人皆有以我獨頑似鄙

眾人皆有以者有以知其所定所止也頑謂面頑如麻痺不知痛痒者鄙謂鄙人我獨頑然無知有似遠鄙之愚民也凡

道藏輯要

道德真經註

三

心集十

民居於國邑繁庶之地者多知居於遠鄙僻陋之地者無知也

我獨異於人而貴食母

此一句總結上文八節自人之所畏至我獨若遺四節言人之爲學者務多能而我獨一無所能自我愚人之心至我獨頑似鄙四節言人之爲學者務多知而我獨一無所知此我之所以獨異於人而我之所貴者則大道之立德也立德者萬物資之以養所謂萬物之母也故曰食母食母二字見禮記內則篇卽乳母也司馬氏曰乳哺光和

右第十七章